

Morning Dogri (NSD) National News Bulletin 16-03-2024

आकाशवाणी

- भारतीय चुनाव आयोग अज्ज 2024 दे लोकसभा चुनाव लेई कार्यक्रम ते तरीकें दी घोषणा करोग।
- प्रधानमंत्री नरेन्द्र मोदी होर अज्ज तेलंगाना च विजय संकल्प सभा गी संबोधत करगंन।
- रक्षा मंत्रालय नै 25 डोर्नियर लेई हिंदुस्तान एरोनाटिक्स लिमिटेड कन्नै करार कीता ऐ।
- भारत दे लक्ष्य सेन, ऑल इंग्लैंड ओपन बैडमिंटन चैंपियनशिप दे मर्दे दे फाइनल च पुज्जी गे न।
- महिला प्रीमियर लीग क्रिकेट च मुंबई इंडियनस गी 5 रंज कन्नै हराइयै रॉयल चैलेंजरस बेंगलोर दी टीम फाइनल च पुज्जी गई ऐ।

<><><><><><>

Election-2024

भारतीय चुनाव आयोग अज्ज दपैहरी मगरा 2024 दे ओंदे लोकसभा चुनाव लेई तरीकें दी घोषणा करोग। चुनाव आयोग नै ऐलान कीता ऐ जे अज्ज 3 बजे आम चुनाव दा कार्यक्रम जारी करोग ते इसदा प्रसारण इक लाइव कांफ्रेंस दे रूपै च कीता जाग। 2024 दे लोकसभा चुनाव इस ब'रे अप्रैल मई म्हीने होने तैह न जिसलै जे मजूदा सरकार दा कार्यकाल 16 जून गी मुक्कै करदा ऐं इस बारी दे चुनाव च कोई 97 करोड़ लोक वोट पाने दे हक्कदार न, जिंदे लेई 12 लक्ख कोला मते मतदान केन्द्र बनाए जांगन। पिछले लोकसभा चुनाव जेहड़े 2019 च होए हे ओ 7 गेड़ें च कराए गे हे ते 23 मई गी वोटें दी गिनतरी होइ ही। तोआई प्रधानमंत्री नरेन्द्र मोदी होर कल संजा इक बारी परतियै मेद प्रगट कीती ऐ जे ऐकती एनडीए अपने पिछले सारे रिकार्ड त्रोड़ग।

<><><><><><>

PM-Vijay Sankalp Sabha

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होर तेलंगाना च अज्ज नगर-कुरनूल च इक सार्वजनिक बैठक विजय संकल्प सभा गी संबोधत करगंन। ओह दऊं दिनें दे राज्य दे दौरे पर न। साढे संवाददाता नै दस्सेआ ऐ जे भाजपा राज्य च चुनां तैआरिएं च एल्लै बीजेपी सब्बने शा अग्गे ऐ। लोकसभा चुनां लेई पार्टी अजे तोड़ी 17एं चा 15 सीटें लेई मेदवारें दे नाएं दी घोषणा करी चुकी दी ऐ। पिछले 10एं दिनें च प्रधानमंत्री दूई बारी तेलंगाना दा दौरा करा करदे न।

<><><><><><><><>

Kala Burgi PM-Public Rally

प्रधानमंत्री नरेन्द्र मोदी होर अज्ज दपैहरी उत्तरी कर्नाटक दे कलबुर्गी च एनवी खेड्ड मैदान च इक सार्वजनिक सभा गी संबोधत करगंन। बीजेपी दे प्रदेश अध्यक्ष ते विधायक बी.वाई. विजेन्द्र, विपक्ष दे नेता आर.अशोक, बीदर दे सांसद भगवंत खुबा। कल बुर्गी दे सांसद उमेश जाधव रैली च मजूद रौंहगन।

<><><><><><><><>

Ujjain Railway

केन्द्री सड़क ट्रांसपोर्ट ते जरनैली सड़कें सरबंधी मंत्रालय नै मध्यप्रदेश दे उज्जैन लेई 188 करोड़ 95 लख रपे दी मंजूरी दित्ती ऐ। इस रकम दी बरतून उज्जैन जंक्शन रेलवे स्टेशन ते महा कालेश्वर मंदर बश्कार मजूदा रोपवे दे विकास, संचालन ते रख-रखाव लेई कीती जाग जेहदे नै नां शड़ा रेलवे राएं आओजाई बधोग सगुआं सैलसफा ते आर्थिक विकास गी बी बढ़ावा थ्होग।

<><><><><><><><>

Goyal Patents

केन्द्री उद्योग ते बपार मंत्री पीयूष गोयल होरें आखेआ ऐ जे चालू माली ब'रे दरान मुल्खै च 1 लख शा बी मते पेटेंट जारी कीते गे न ते कुल दरखास्तां देने आलें चा 52 फीसद भारती न।

गोयल होरें कल मुंबई च भारत रत्नम मेगा कामन फ़ैसिलिटी सेंटर दा कम्म रंभने मगरा इक प्रेस कांफ्रेंस गी संबोधत करदे होई एह जानकारी दित्ती। एह केन्द्र सलाना 16 सौ नोजवानें गी हीरे-जवाहारातें ते गैहने-बंदे सरबंधी सिखलाई हासल करोआग। गोयल होरें जानकारी दित्ती जे इस माली ब8रे च सरकार आस्सेआ जैम पोर्टल परां 3 लक्ख 82 ज्हार करोड़ रपे दी खरीददारी कीती गई ऐ। उनें मेद बन्नी जे इस माली ब'रे 4 लक्ख करोड़ दा लक्ष्य हासल करी लैता जाग।

<><><><><><><><>

Defence Aircraft

रक्षा मंत्रालय नै नमीं दिल्ली च भारतीय नौसेना दे 25 डोर्नियर जहाजें दे मिड लाईफ अपग्रेड यानि एमएलयू लेई हिंदूस्तान एयरो-नॉटिक्स लिमिअेड कन्नै 2 ज्हार 890 करोड़ रपे थमां मते दे अनुबंध पर दस्तखत कीते न। डोर्नियर एयरक्राफ्ट लेई एमएलयू च अज्जै-कल्लै दे एवियोनिक्स सिस्टम ते प्राइमरी रोल सेंसर गी शामिल करने लेई एहदा दर्जा बधाना शामिल ऐ। एहदे च बेहतरी आनने कन्नै समुंद्री निगरानी, तटीय निगरानी, इलैक्ट्रानिक इंटैलिजेंस ते समुंद्री डोमेन जागरूकता दे विकास दी प्राथमिकता गूमका नभाने लेई डोर्नियर विमान दी परिचालन क्षमता च मता इजाफा होग। एहदे च सुधार कन्नै भारतीय नौसेना डोर्नियर्स गी खोज ते बचाव, मैडिकल ते जख्मिणं गी बाहर कड्डने ते संचार लिंक दी माध्यमिक भूमका नभाने योग बनाई देग। मिड लाईफ अपग्रेड कन्नै साढे 6 ब'रे दे कम्मं दरान इक लक्ख 8 ज्हार दिनें दा रोजगार पैदा होने दी मेद ऐ।

<><><><><><><><>

CAA

नागरिकता संशोधन अधिनियम यानि सीएए-2019 तैह्त आवेदन करने लेई सीएए-2019 मोबाइल ऐप शुरू होई गेआ ऐ। गृहमंत्रालय नै आक्खेआ ऐ जे आवेदक गूगल प्ले स्टोर थमां ऐप डाउनलोड करी सकदे न। इसी वैबसाइट indiancitizenshiponline.nic.in थमां बी डाउनलोड कीता जाई सकदा ऐ।

<><><><><><><><>

Shah Election

केन्द्री गृहमंत्री अमित शाह होरें आक्खेआ ऐ जे भारतीय राजनीति च काले घन दे असर गी खत्म करने लेई चुनावी बांड आंदे गे हे। उनें आक्खेआ जे ओ चुनावी बांड पर सुप्रीम कोर्ट दे हुक्म दा पूरा सम्मान करदे न पर उनेंगी लगदा ऐ जे चुनावी बांड पूरी चाल्ली खत्म करने दे बजाए एहूदे च सुधार कीता जाना लोडचदा हा। कल नमीं दिल्ली च इक कार्यक्रम दरान बोलदे होई गृहमंत्री होरें कांग्रेस पार्टी दा जिक्र करदे होई दोष लाया जे विरोधी घडें दे नेता राजनीतिक चंदा नकदी दी शकल च लेंदे हे, की जे चंदे चा ओ थोड़ी जनेई रकम पार्टी दे नां पर जमा करदे हे ते बाकी रकम अपने खीसे च रखी लेंदे न। उनें आक्खेआ जे कुल 20 ज्हार करोड़ रपे दे चुनावी बांड चा बीजेपी गी कोई 6 ज्हार करोड़ रपे थोए न। उनें सुआल पुट्टेआ जे आखर 14 ज्हार करोड़ रपे दे बांड कुत्थें गे न। उनें इब्बी आक्खेआ जे टीएमसी गी 16 सौ करोड़ रपे, कांग्रेस गी 14 सौ करोड़, बीआरएस गी 12 सौ करोड़ रपे, बीजेडी गी 150 करोड़ ते डीएमके गी 639 करोड़ रपे थोए न। शाह होरें आक्खेआ जे बीजेपी गी 303 सांसदें दे बावजूद 6 ज्हार करोड़ मिले न ते बाकी दे 242 सांसदें दे बावजूद 14 ज्हार करोड़ रपे। गृहमंत्री होरें आक्खेआ जे स्हाब कताब होने दे बाद विरोधी दल जनता ते मीडिया दा सामना नेई करी सकगंन। इक राष्ट्र इक चुनां बारे उनें आक्खेआ जे इस मुल्खै च बार बार चुनां होंदे न ते लम्मे समें तगर लोक चुनां च रूज्जे दे रौंहदे न, बार बार खर्चा होंदा ऐ, बार बार आदर्श संचार संहिता लागू होने कारण विकास दे कम्म बी रूकदे न, इस करियै “इक राष्ट्र इक चुनां” आली बवस्था लागू करना इक बेहतर विकल्प ऐ।

<><><><><><>

Badminton

ऑल इंग्लैंड ओपन बैडमिंटन चैपियनशिप च लक्ष्य सेन नै मलेशिया दे ली.ज जिया गी हराइयै मर्द एकल च प्रवेश कीता। दुनिया दे 18में नंबर दे भारतीय खडारी नै क्वार्टर फाइनल च जिया गी 20–22, 21–16, 21–19 कन्नै जंदी रातीं वर्मिंघस च हराया। लक्ष्य सेन दुनिया दे नंबर 9 ते इंडोनेशिया दे खडारी जोनाटन क्रिस्टी दे कन्नै अज्ज दपैहरी मगरा मकाबला खेड्ङगंन।

<><><><><><>

WPL

महिला प्रीमियर लीग क्रिकेट च रॉयल चैलेंजर बेंगलोर नै इक रोमांचक मकाबले च 5एं रंजें कन्नै मुंबई इंडियनस गी हराइयै फाइनल च थाहर बनाई। एह मैच जंदी रातीं दिल्ली दे अरूण जेटली स्टेडियम च खेड्डेआ गोआ। इक सौ 36 रंजें दा पीछा करदे होई मुंबई इंडियनस दी टीम तैहशुदा 20 ओवरें च 6 विकटें दे नुकसान पर 130 रंज गै बनाई सकी। एहदे थमां पैहले रॉयल चैलेंजर बेंगलोर नै पैहले बल्लेबाजी करदे होई 20 ओवरें च 6 विकटें दे नुकसान पर 135 रंज बनाए। आस्ट्रेलियाई ऑल राउंडर एलिसे पैरी 50 गेंदें च 66 रंज बनाए, जिसलै के श्रेयंका पाटिल नै बेंगलोर लेई 2 विकटां लैतियां। मुंबई इंडियनस लेइ हरमनप्रीत नै 33 रंज बनाए। फाईनल च रॉयल चैलेंजरस बेंगलोर दा मकाबला तारें दिल्ली कैपिटल्स कन्नै होग।

<><><><><><>